

POLITICA

## Litazions aministratives, confirmà la dates

*Ai 20 e 21 de setember se jirà a litèr per i Comuns,  
l Comun general de Fascia e per l referendum per  
l tai di parlamentères*

L'è ofizial, la litazions de Comun, che aessa cognù vegnir fates ai 3 de mè e che é states sperlongèdes per via de l'emergenza Covid-19, les sarà ai 20 e 21 de setember. En lunesc ai 13 de messèl l president de la Region Arno Kompatscher, a una col president de la Provincia de Trent Maurizio Fugatti, à sotescrit l decret.

La litazions tolarà ite passa 158 comuns del Trentin e 113 del Sudtiroil e les sarà n test litèl emportant per la gran zitèdes desche Trent, Roveredo, Riva e Cles, ma ence per noscia valèdes. Te Fascia se litarà no demò per i 6 Comuns ma ence per l renovament del Consei del Comun general de Fascia. Amò apede chesta data é stata cernuda percheche te chi dis se jirà a litèr ence per l referendum costituzionèl sul tai di parlamentères.

Se trata de na sort de *election day* donca, ajache l'è stat metù ensema aministratives e referendum. Chest per limitèr i risesc sanitàeres con i

adempimenc de sanificazion e netijia e ence per tegnir serèdes la scoles manco dis che l'è meso. Se spetèa da temp conferma de la dates dò l sperlongiamet dezidù chesta aisciuda. Taca ite ades n istà impegnatif per i movimenc e i partit politics ajache la candidatures a ombolt e procurador e la listes per i desvalives conseies cognarà vegnir depojitèdes per i 10 de aost.

Te Fascia chesta aisciuda se aea tacà a sentir oujes de candidac e listes ma dapò dut se à ferà. Ades i doi movimenc politics de Neva Ual e Sociazion Fassa, che se troarà de contra per la litazions del Comun general, arà temp presciapèch n meis per meter jù sia listes de candidac e medemo ence chi che volarà se meter a la leta per l'encèria de ombolt e de conseieres per i 6 Comuns de Fascia.

Na corsa contra l temp donca per dezider programes e candidac che



*Ai 20 e 21 de setember se litarà per renovèr la encèries aministratives del Comun general de Fascia e di 6 Comuns de la val.*

jirà a rejer i enc aministratives de noscia val.

**Referendum per tor demez 115  
senatores e 230 deputac**

Ai 20 e 21 de setember i litadores vegnarà chiamé ence a litèr per confermèr o refudèr la lege di M5S che muda la composizion de la Cambres per tor demez 345 poltrones: 115 per l Senat e 230 per la Cambra. La lege costituzionèla é já stata aproèda amò de otober del 2019 e la muda i articoi 56, 57 e 59 de la Costituzion che revèrda la

composizion del numer di parlamentères. Ajache se trata de n mudament de la Costituzion chesta lege à abù n iter rinforzà, l'à cognù passèr doi outes a la Cambra. Ajache la seconda outa la lege no é stata aproèda da la maoranza di doi terc di componenc de ogne cambra, n quinto di senatores à podù domanèr l referendum confermatif.

Se l referendum aessa n ejit positif canche sarà ora de neva litazions se jissa a litèr 200 senatores e 400 deputac enveze che 315 senatores e 630 deputac descheche l'è ades.

Se i litadores cognessa palesèr na stima de contra a la reforma se jirà deretorn a la situazion da inant con 945 parlamentères en dut.

Se trata de n referendum confermatif, disciplinà da l'articolo 138 de la Costituzion, per chel che no l'è pervedù che se cogne arjonjer l quorum. Donca se i sci passa via i no l tai di parlamentères vegnarà confirmà con 345 posc demanco. Con chest smendrament de parlamentères se stima n sparagn de 100 milions de euro a l'an.

*Monica Cigolla*

